



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

Ravindra Jadeja T20I
asaya nungianener

Biden-i pa yarir dang election nung
takok angutsü nenshia ashir

VOL. XXI ISSUE NO. 259 (ADOK 259)

DIMAPUR TENTONÜ (MONDAY)

CHITENI (JULY) 01, 2024

₹ 5.00

Governor-i ULBs nung takoker nem tenüngsang agütsür

Dimapur, June 30, 2024 (TYO): Nagaland Governor La Ganesan-i Urban Local Bodies election nung takok anur ajak nem tenüngsang agütsüogo.

"Nagaland nung sensotemi nenok dang temulung alemer ta asüba nenok takok ajanga sayur. Maneni takok anguba tetsür ajak nem tenüngsang balaka agütsür. Nenoki Nagaland renlokba aser azükaruba nung shilem tulu agütsü ni tamang akar" ta Governor-i ashi.

Ganesan-isa Nagaland State Election Commission, ozüng amertem aser election dak sendakba ketdangsur ajak dang ULBs election tiptema agiba atema tenüngsang agütsü.

ULBs nung züngsem ajaki tangatetba tajung nung, bendanga agüja aser tejakleni aotsü atema mangdang yur inyaksü ayongzüker. Nenoki temelenshi tajung bener arutsü imlaa atar ta Governor La Ganesan-isa metetdaksü.

Dr. Belenso indang ISRO kulikaket ashishiteper

Guwahati, June 30, 2024 (Agencies): Indian Space Research Organisation (ISRO)-i Naga lanur ka nem tenüngsang agütsüba taila kulikaket ka ajanga ashishiteper ken o tulu ka adoka lir.

ISRO-i Reusable Launch Vehicle (RLV) technology yanglutetba atema Dr. Belenso T. Yimchunger nem tenüngsang agütsüba kulikaket ka prokshia liasü saka iba kulikaket ya taila ta jangaogoo.

Dr. Belenso T. Yimchunger-i 'Pushpak' RLV technology yanglutetba nung tongti shilem agi ta The Better India report ka nung ashiba sülen ashishiteper ken o adok. Iba report nung ISRO-ia Dr. Belenso nem tenüngsang agütsüogo ta ashi.

Nagaland PHED minister Jacob Zhimomi-i Dr. Belenso nem tenüngsang agütsü aser Naga lanurtem ajungmesor ka ta

Ajisüaka, journalist Sidharth MP-i ISRO den jangjashitepba sülen kulikaketji taila ta metetdaksü.

Journalist kari taila accounts lapok aser pai memeteti oacetem adok ta Belenso-ia ashir.

IIT nung medemer kari pa dangi kulikaket yok aser iba onük department den angatettepogo ta Belenso-isa ashi.

Pa indang taila accounts kar lir saka pa ISRO den tesentaktep lir sak ibaji telung nung dang ta Belenso-isa ashi.

Külen, ISRO nung Chief Information Officer Dr. B H M Daruksha-i 'Pushpak' RLV technology mapatong nung Belenso shilem magi ta metetdaksüogo.

ISRO-i Belenso den telung nung tenangzüktep kecha mali ta Dr. Daruksha-isa ashi.

ULBs tentettsü atema NDPP MLA kar shimer


Dimapur, June 30, 2024 (TYO): Nagaland nung Urban Local Bodies (ULBs) tentettsü atema Nationalist Democratic Progressive Party (NDPP)-i district shia nung MLA tem shimogoo.

MLA temi Region Election

Committee, Region office aser party lenisüba den angatettepa pei pei lemzüka tesem nung ULBs tentettsü mapa lemzüksür ta President Chingwang Konyak-i June 30, 2024 nü sangdong ka nung metetdaksüogo.

1. Mr. Moatoshi Longkumer - Dimapur Municipal Council
2. Mrs. Hekani Jakhalu - East Dimapur Town Council
3. Mr. Zhaleo Rio - i) Chimoükedima Town Council
ii) Medziphema Town Council
4. Mr. T.R. Zeliang - i) Jalukie Town Council
ii) Peren Town Council
iii) Tening Town Council
5. Mrs. Salhoutuonuo Kruse - i) Kohima Municipal Council
ii) Chiephobozou Town Council
6. Dr. Kekhrielhoulie Yhome - Tseminyu Town Council
7. Mr. KG. Kenye - i) Pfutsero Town Council
ii) Phek Town Council
8. Mr. Kudecho Khamo - Chozuba Town Council
9. Mr. Z. Nyusietho Nyuthe - Meluri Town Council
10. Mr. Metsubo Jamir, Convener - Mokokchung Municipal Council/Changtongya Town Council
11. Mr. Temjenmenba - Mangkolemba Town Council
12. Mr. Mhathung Yanthan - Wokha Town Council
13. Mr. G. Kaito Aye - i) Satakha Town Council
ii) Atoizu Town Council
14. Mr. K. T. Sukhalu - Zunheboto Town Council
15. Mr. G. Ikuto Zhimomi - Aghunato Town Council

Tanü nungü India ajungalen Criminal Laws 3 benshir



New Delhi, June 30, 2024 (Agencies): July 1, 2024 nungi India ajungalen Criminal Laws tasen 3 mapa küma tenzüksü.

Asüng nungi Bharatiya Nyaya Sanhita ajanga Indian Penal Code, Bharatiya Nagarik Suraksha Sanhita ajanga Code of Criminal Procedure aser Bharatiya Sakshya Adhinyam ajanga Indian Evidence Act melenzüksü.

Criminal Laws tasen 3 nung tongtipang ozüng kar:

1. Ozüng alema inyakba ken o angadanga sülen anogo 45 tsüngda obendang agütsüsüla. Okadak mezüng noktaka angadanga sülen anogo 60 tsüngda tai tongloktsüba ken o tem renemtsüla. State sorkar ajaki kulisürtem kümzüka ayutsü atema witness protection schemes inyaksüla.
2. Tashiyim agi shi nung medemer dang nungi osang tetsür police ketdangsur kati tetsürlar kinunger/guardian lia record

asütsü. Anogo tenet tsüngda medical reports renemtsüla.

3. Tetsür aser tanurtem dak tashiyim inyakba atema ozüng tasen benoker. Tanur alizükba mesüra ayokba ya mapa kanga tamajung nung züngoker aser temerenshi tulu lir. Tanur tetsür ka dak tebur loktii tashiyim agi shi nung medemba atema tasüba temerenshi mesüra taküm piyong tepuokdak ayutsü temerenshi agütsüsü akok.

4. Tetsürtem dang kibong akümtsü ta tiyazü nangzüka sülen senzüka toktsüba atema ozüngi merenshitsu.

5. Tashiyim ajangshiba tetsürtemi anogo 90 tsüngda parnok ken o tem indang osang mapang shia angashitsu. Tetsür aser tanurtem dak tashiyim inyakdang yiruba atema mozü ki ajak free first-aid mesüra medical treatment agütsüsüla.

6. Tai tongloktsür aser takoksa ajurur naprongi anogo 14 tsüngda, police report, charge

sheet, statements, confessions aser tanga documents angutsü. Ken o angaba nung mapang meindoktsü atema okadaki anaben tashi dang ken o angadanga anena ayutsü akok.

7. Tang nungibo police station tonga moi electronic communication ajanga ken o benoktsü akok. Zero FIR ajanga nisungtemi police station mashii ka nung First Information Report benoktetsü.

8. Police-i apuba nisung kati tangar ka dang pa indang osang ashitsu temeten angutsü. Kinunger aser medemermeti metettsü atema police stations aser district headquarters ajak nung nisung apuba osang tejanga sayutsü.

9. Tang nungibo forensic experts-i kanga mejungi lendong atalokba tesem tonga oa kulitem bendentsü.

10. Tang nungi 'gender' ta asüba nung transgender people dendaktsür. Tetsürtem dak tashiyim mapa kar atalokba nung kokra tetsür magistrate kati dang osangtem record asütsüla. Ajisüaka tetsür magistrate melira tebur magistrate kati tetsür ka lia record asütsü akok. Tashiyim agi shi nung medemba indang osang audio-video ajanga record asütsüla.

Eastern Nagaland ULBs nung nübo meshimoktsüla: WSH & CPO

Dimapur, June 30, 2024 (TYO): Nagaland sorkari Eastern Nagaland kübok municipal aser town councils nung candidate shinga meshimoktsüla ta Western Sumi Hoho (WSH) aser Chakroma Public Organisation (CPO) ajanga metetdaksüogo.

Tesüba mapang Eastern Nagaland nungi candidate tem

CPO aser WSH lushi nung shilem magidaktsü aser iba ya ENPO-i Indian aser State Elections nung shilem magitsü bangjemtepba sülen anidakba liasü ta parnoki ashi.

Eastern Nagaland nung government nominees ta ser nisungtem shimokra ibaji ENPO tangatetba anema asütsü aser

state sorkar election maparen meshitaki inyakba ama akümtsü ta WSH aser CPO-i ashi.

Nagaland sorkari Eastern Nagaland nung akhümtsübuttsüla aser town council tem nung ENPO area nominees meshimtsü ayongzüker ta CPO aser WSH ajanga metetdaksü.

Nagaland Indigenous Peoples Forum-i TPF sentong nung aden

Dimapur, June 30, 2024 (TYO): June 30, 2024 nü Nagaland Indigenous Peoples Forum (NIPF)-i Tripura Peoples Front (TPF) foundation day nung denogoo.

Iba sentong ya Agartala nung "Our Land Our Rights, Green

Land Healthy Life" omen nung ajemdaker among aser President Dr T. Lima Jamir lenisüba kübok NIPF teshimtet teloki kati shilem agi.

Northeast State ajak nung lisopurtem temeten kümzüka ayutsü atema Indigenous Peoples

Forum tenteta liasü.

NIPF teshimtet telok nung Advisor Khehoto Swu; Vice President Khaketo K. Sumi, Vice President Keneiletuo Zumvu; Treasurer L.T Jamir; Finance Secretary Arila Sangtam aser sanen luden züngsemtem aden.

President Murmu-i Manipur indang mejembiba aitsür

Imphal, June 30, 2024 (Agencies): June 27, 2024 nü President Droupadi Murmu-i Parliament nung o jembidang Manipur tensa indang mejembiba aitsür ta Manipur Pradesh Congress Committee (MPCC)-i metetdaksü.

President Droupadi Murmu-i Manipur indang mejembiba ajanga nübertemi parnok mezüngmeshi asüba ama bilemer

ta MPCC working president Kh Devabrata-i ashi.

"President Murmu-i Manipur tensa indang jembitsu ta onoki imlaa liasü kechiyong iba ya linük nung tebilemstü khuret tulu ka lir. Manipur nung narco-terrorism aser prangpong abenertemi state sorkar anema rarar. Kodaser President-i iba ama tebilemstü ya linük tebilemstü ama mezüngshir?" ta Devabrata-i

ashi.

"President indang onük ya Union Cabinet ajanga agizük anungji PM Narendra Modi-i maneni Manipur mezügshitsu asü. Iba tebilemstü ya mezüngoktsü tasa ka atonga lir asü?" ta paisa asüngdang.

NDA MLA telok ka New Delhi-i aoba sülen ano Manipur MLA ana Honibarnü Imphal nungi New Delhi-i ogo.

Naga Students' Union Dehradun lokti senden amen



NSUDD nung ketdangpur tasen aser tejentem den election commission külemi tangokba noksa nung angur.

Dimapur, Aami/June 30 (TYO): Naga Students' Union Dehradun lokti senden den külemi ketdangpur tasen shimba sentong ka June 22, 2024 nü Dolphin PG Institute of Biomedical & Natural Sciences nung agia liasü. Lokti lungjemer tejakleni aotsü aser züngsemtem metetpelatsü atema iba lokti senden ya tongtipang sapang ka lir. Iba sentong nung taoba mapang takok anguba, tang tayongzükba balala aliba aser

tarutsü nükla indang jembia liasü. Lokti senden amenba nung onük balala jembiba sülen NSUDD anitsü asoshi kanga yongyatepa aliba election agia liasü. *NSUDD nung ketdangpur tasen yamai shim:*
1. President - Temjensangba
2. Vice President - Hetoki T Tuccu
3. General Secretary - Ketuvinuo Sothu
4. Asst. General Secretary -

Bepeto K Awomi
5. Finance Secretary - Mengunuo Pfusenuo
6. Women Coordinator - Temsulila Longkumer
7. Games & Sports Secretary - Niputo S Kiho
8. Asst. Games & Sports Secretary - Hesheka Chophi
9. Social & Cultural Secretary - Kutholulu Sapu
10. Information & Publicity Secretary - Bipenthung Y Humtsoe.

Peren nung Anti Malaria Month mungogo



Peren district kübok meta talang nung aliba Nzauna yimtsüng nung Anti Malaria Month amungdang tangokba noksa ka nung ketdangsür aser shilem agirtem angur.

Dimapur, Aami/June 30 (TYO): CMO Peren kübok National Centre for Vector Borne Diseases Control (NCVBDC) ajanga "Accelerating the fight against Malaria for a more Equitable World" omen kübok June 30, 2024 nü Anti Malaria Month mungogo. Ita piyong campaign atema State NCVDC ajanga yimtsüng 12 shimtet aser item yimtsüngtem ya low reach/possible malaria susceptibility/asor atüngsü tasak tesemtem nungi shima liasü. Item nungji ajemdaker Government facilities nung ramen angati tendangtsü aser anepalutsü anguba nung ajemdaker Vector Borne Diseases, Prevention and Control indang IEC/BCC amaparen GMS Samzuiram,

GMS Lilen, GMS Ikiesingram, GMS Jalukiezangdi, Besumpuilwa, Songsang, Pelhang, New Ngaulong, Lower Sinjol aser Peren district nung Tening Block kübok Nzauna aser Lalong yimtsüng tem nung ramen tendanga LLINs amshiba repranga liasü. Maneni kasa mapang parnoki nüburtem dang merila poktetba tesemtem ajemdaksütsü asoshi maparen balala inyakba nung nüburtemi shilem agitsü ajungshia jaja. District Vector Borne Diseases Control Unit Peren ajanga ANMA Integrated Development Association (AIDA) den lungjemer June 22 nü Beisumpuikam yimdak Malaria Elimination indang awareness sentong ayongzükba Jalukiezangdi yimtsüng nungia

lenirtem dena liasü. Iba sentong nung tongti o jembir aser tesemdang tongti District Vector Borne Diseases Control Officer, Dr. Hedungkiebe liasü. AIDA ajanga NCVBDC Peren den lungjemer ramen samadaksütsü atema yimtsüng ana ya adopt süa liasü, anungji iba sentong ya ajanga AIDA aser NCVBDC ajanga ramen samadaksütsü atema meranga inyakba sayur. Vimekhrie-u Metsieo, District VBD Consultant ajanga ashiba agi, shimtetba yimtsüng 12 den külemi district ajanga Pedi aser Heunambe nung mobile population/migrant workers tem screening süa liasü. Iba maparen ya Peren block MTs aser Surveillance Workers temi anir inyaka liasü.

DAKT ajanga Admission Help Desk lapoka lir

S.No	Inquiry	Names	Contact
1.	CUET	Achilla Margret Kichu	9953173758
2.	Delhi University(North Campus)	Imcharenba Atsongchanger Samanir Imchen	9863080191 8527908997
3.	Delhi University(South Campus)	Kilemjungla Lemtur Merenienla Pongener	8259070504 7005167031
4.	Jawaharlal Nehru University	Lendi Walling	9582864489
5.	Ambedkar University	Juzen Jamir	8920746176
6.	Private Universities	Imliakum Jamir Satemmenla Imtiyala Aier	7005815026 9612507315 8974152769
7.	St. Stephen's College(DU)	Yimyatella Longkumer Taochilla Pongener	7005568184 8794836621
8.	Jesus and Mary College(DU)	Imtimongla Longkumer	9077222846
9.	Coaching(UPSC/JEE/NEET)	Lempusen Jamir	8810397227
10.	Accommodations(PGs/Rent)	Limasenla Longkumer	88104 06068

Dimapur, Aami/June 30 (TYO): Delhi-NRC region nung academic year 2024-25 atema ndergraduate (UG), Postgraduate (PG), Ph.D. programs aser coaching centers nung admission aginertem yaritsü atema Delhi Ao Kaketshir Telongjem (DAKT) ajanga Admission Help Desk ka

lapokogo. Iba Help Desk ya ajanga kaketshirtem Delhi-NRC region nung azüngtsüpur kaketshir kaket reju aser coaching centers balala nung admission agiba nung yaritsü, anungji kaketshir aser tsürabur temi maratai agüja aliba contact number ajanga tongteprateptsü akok

Assam Rifles temi Chingnyu nung security senden ayongzük



Dimapur, Aami/June 30 (TYO): Assam Rifles temi Mon district kübok Shengha Chingnyu yimtsüng nung June 29, 2024 nü security senden ka ayongzükba amen. Region nung yimjung aser tesendaktep tajung ajungkettsütsü aser nüburtem tetsübo nung malitsü mechi iba senden ya ayongzükba liasü, kong yimting pongu nungi shilem agia liasü. Iba senden nung security dak sendakba onüktem, tarutsü nung lendong timtem mataloktsü asoshi osangtsüsang lemsateptsü aser Security Forces aser nüburtem

tangatetep nung alitsü asoshi ken o balala jembia liasü. Iba senden nung Assam Rifles temi region nung security tsütsü timtem aliba aser yimjung nung alitsü atema mera balala agiba indang lemsatepa liasü. Senden nung adenertem dang Armed Forces nung mapa balala adokba aser project balala inyakba indang osangtem lemsatep. Assam Rifles temi iba ama sentong ayongzükba aser maparen balala inyakba atema nüburtemi pelaba lemsatep aser tarutsü anogotem nunga Security Forces den teka amteper inyaksü mulunga aliba shia liasü.

Dimapur nungi nisung kati IIT JEE Advanced 2024 tatidang ajangtet

Dimapur, Aami/June 30 (TYO): Dimapur nungi Raj aser Khushbu Patni na jabaso Kartik Patni-i IIT JEE (Joint Entrance Examination) Advanced 2024 tatidang nung takok ngua liasü, koba alima nung tasaktiba tatidang rongnung ka ta züngshir. Ajidang masü taküm Nagaland nungi IIT (Indian Institute of Technology) azüngtsü jangrari takok angur pa kisüng alitsü. Linük nung IITs 23 aliba nungi tajungtiba ka nung admission agitsü atema Kartik ya July ita online ajanga counselling agitsü imlar. JEE Advanced 2024 agütsür nisung 1.80 lakhs nungi pai All India Rank 2273 nguteta liasü. JEE Main 2024 nung nisung lakh 14-i agütsü aser iba sülen IIT JEE Advanced 2024 ya agia liasü. Kartik yagi JEE Main 2024 nung 99.92 percentile nguteta



Kartik Patni liasü aser general category kaketshir atema cut-off ya 93 percentile liasü. Pa ya JEE Main 2024 nung All India Ranks 1315 nung liasü. Taküm Sant Gyaneshwar School, Delhi nungi Kartik-i CBSE indang Class XII nung marks shilem 91.2 nguteta liasü. Aji masüidang 2022 küm Class X nung pai Hope Academy nungi marks shilem 95.2 nguteta liasü. Pai linük nung tajungtiba institute, IIT Mumbai nung azüngtsü tejangraba lir.

Küm100 ajungba Tasoba Tepela Anogo Tsürabur Wb. I. Shijung Walling (Dibuia)



Tanü July 01, 2024 anogo nung na tepela tasoba küm 100 ajungba tepelamung amungdang, Tsüngrem Tulusang shiba taochi ket agi taoba küm 100 tashi nü taküm kümzüka anir aru, onoki Pa nem dang sentsüwangshi aser konang nüngsang ajak agütsür.

"Kibubai na moajanga aser nüka liang; Kibubai Pa jak nü dak yalokjang aser nünem tepela aser tesünep agüjangma. Tsüngremi ano tarutsü anogo tajungtem aika nü nem moajangma. Iba tasoba küm noklangjungmung ya jangratema temoatsü manung mongangma !

- Nai meima aliba Kinungertem Sarasadem.

Tanü Parliament nung Opposition-i NEET exam onük benoktsü

New Delhi, Aami/June 30 (Agencies): Hombar nungi tenzüka Parliament House anaprongla nung NEET exam question paper leak asüba, osettsüset nung jenjang atuba aser Agnipath scheme densema tongtibang onük aika nung o lemteptsü, ta kettangsertemi metetdaksü.

Hokolbarnüa Lok Sabha aser Rajya Sabha naprongla nung Opposition-i NEET mangatettep onük benoka o lemteptsü akhangba ajanga rongrong adoka liasü.

Hombarnü Lok Sabha nung opposition-i NEET paper leak ken o dang masü saka linük nung mapa manguba tebilemtsü tuluba akümiba onüka benoktsüa akok.

BJP MP aser taoba mapang Union Minister, Anurag Thakur-i Lok Sabha nung Tiri jembiba onük nung ajemdaker o lemteptsü atema Lok

Sabha-i ghonda 16 lemzüksüogo aser Mongolbarnü Ato kilonser Narendra Modi-i telangzüba agüja o lemtepta tembangtsü.

Rajya Sabha nungbo BJPMP, Sudhanshu Trivedi leniba nung o lemteptsü atema Rajya Sabha nung ghonda 21 lemzüksü aser Bodhbarnü Ato kilonser Modi-i telangzüba agütsütsüa akok.

Yashi Opposition lenir, Mallikarjun Kharge leniba nung opposition INDIA teloktept nungi züngsemtemi Rajya Sabha nung sabangleni oa longkak aita liasü. Longkak aita mapang nung Congress MP, Phulo Devi Netam süchia aoba sülen hospital-i anir ao.

Hokolbarnü Lok Sabha nung Opposition lenir, Rahul Gandhi-i Ato kilonser Narendra Modi dang Parliament nung NEET exam ken o nung akhümtsübutepa o lemteptsü mepishia liasü.

General Upendra Dwivedi-i Indian Army tongti mapa agizükogo



Rifles nungi lir. Pa ya taküm February ita nungi Vice Chief of Army Staff liasü.

Tamalen General Upendra Dwivedi-i menden balala bena liasü; item rongnung 2022 küm nungi 2024 küm tashi Northern Command nung general officer commanding-in-chief inyakba densema lir.

New Delhi, June 30 (Agencies): Amongnü General Upendra Dwivedi-i General Manoj Pande ket nungi Chief of the Army Staff (COAS) mapa agizükogo.

30buba Chief of Indian Army ji Jammu & Kashmir

Northern aser Western tsütsü arrtsülen operation balala atema pai asalentong yangluja liasü aser Jammu & Kashmir nung kiralongra anema asalentong yangluba nunga shilemagia liasü.

(Maneni tapak 8 nung...)

Maharashtra nung Cong, Sena (UBT) aser NCP (SP) longjemer tokteptsü

Mumbai, June 30 (Agencies): Amongnü NCP (SP) tongti lenir, Sharad Pawar-i, taküm October ita nung Maharashtra assembly election nung NCP, Congress aser Uddhav Thackeray-i aniba Shiv Sena (UBT) party tem longjemer tokteptsü, ta metetdaksü.

Mumbai nung osangbenertem senden ka nung jembidang Pawar-i, 2024 küm Lok Sabha election nung teloktept nung densema aliba party tilatem atema state assembly election kümzüksüji Maharashtra nung tongti opposition party tem teinyaktsü mapa lir, ta ashi.

Maharashtra nung opposition Maha Vikas Aghadi (MVA) teloktept nung densema aliba party temji NCP (SP), Congress aser Shiv Sena (UBT) party tem lir. 2019 küm November nungi 2022 küm June ita tashi state nung MVA teloktept sorkar liasü saka iba sorkar chirep.

Pawar-i, Maharashtra nung nüburtem atema opposition-i lenir ka shimtsü, ta ashi.

State nung sorkar melentsü nüngdak, aser sorkar atsüngdoktsüji opposition teloktept teinyaktsü mapa lir, ta Sharad Pawar-isa metetdaksü.

"Arjuna indang target ji (Mahabharata otsü nung) tenük (ango tenük) liasü. Onok tenük ajak Maharashtra election nung ranglokogo. Congress, NCP (SP) aser Uddhav Thackeray'er Sena (UBT) longjemer Vidhan Sabha election nung tokteptsü," ta pai ashi.

Taoba mapang Maharashtra chief minister-i, party tem tsüngda ano menden melemsa, ajisüaka kobi melii menden lemsatsü, ta metetdaksü.

2024 küm Lok Sabha election nung nübur aikati NCP (SP), Shiv Sena (UBT) aser Congress yariogo, ta pai ashi.

"Ajisüaka item party asem ama Left parties aser Peasants & Workers Party (PWP)-a teloktept nung densema liasü, saka onoki Lok Sabha nung parnok nem menden melemsatsü. Item party kümzüksüji onok mapa," ta pai ashi.

Hokolbarnü Eknath Shinde-i aniba sorkari benokba budget dak sendakba nung tasüngdangba ka langzüdang Pawar-i, "Nai market-i pocket tazüng ora kechi asütsü? Anogo ishika tsüngda atangji ji kechiar jungkai adoktsü," ta ashi.



"Chiyongtsü Tajung Amshitsü Arok Khuret"

NA KECHI CHIYONGTSÜ ACHIR AJI METETTSÜ ATEMA CHIYONGTSÜ SEPA ALIDAK FOOD LABELS ZÜNGANG

Labels nung item ya repringang:-

- FSSAI Registration /License No.
- Name of the Food Item
- Brand Name
- Nutritional Information
- Ingredients
- Net Weight/MRP
- Date of manufacturer
- Manufacturer Address
- Batch No.
- Best Before Date/Expiry
- Allergen Declaration
- Veg or Non-Veg Logo



Metokmeperi kar danga lira yangi mail süang: foodsafetynagalandhelpline@gmail.com
Mesüra yangi jembiang : +91 6009970644
Mapang : 11:00 a.m - 2:00 p.m
MONGULBAR & BREHOSTIBAR (mapa inyakba anogo)

State Food Safety Authority,
Department of Health and Family Welfare, Govt.of Nagaland.



TIR YIMYIM YIMOBILEM (EDITORIAL)

DIMAPUR TENTONÜ, JULY (CHITENI) 01, 2024

Election ya jangratema agitsüla

Tanü putu nung yimten yimsüsübaren nung election ajanga nübertemi pei yimten yimsüsür shimba mapa aser sentong yasa tajungba lir, kechiyong iba inyakyim yagi nübertem nem yimten tashi aser temeten agütsür. Ibayongji, alima nung tashitemet kintem Europe aser America nungertemia iba yimten yimsüsübaren ya-ang tajungba ta agizüka benshir. Kasaji, alima nung linük tulu India ama ka nunga akhi chuba yimli ajak anendaktsür nübertemiang pei yimten madak yimsü südaktsüsa atema election agia yimsüsür shimer. Atangji, yimten tashi amshia yimsü asütsü menden rakteper asünungji nübertem rongnung yimten telok balala lemsar tokteptsüsa akümer, idangji nisungtem rongnung tejak tsükteper aser tamajunga tenteper. Ajisüaka, ibaji kodang tangatetba tajunglen nungi agidir, ibaji asen akhi alu mapa inyakdang mapa koknüa asatepba amai ka dang akümtsü. Kasaji, kidanga asenok ki mapa junga inyaknüdang kinunger rongnunga mepelateptsüsa tamajung tentepa rarateper saka mapa junga temerbo pelatepa külemi chiyonger. Ibaji mesüka election mapang nisung o nisung na aser telok o telok na tsüngda kati ka aitsütepa jembiteptsüsa akok saka election ji sen agi nübertem temeten ayokba aser aliba bazaar amai ka dang kümdaktsüra, ajibo election magiang tajungba. Kasaji, nübertem nem pei yimten madak yimsüsütsü atema election ajanga yimsüsür shimtsü maongka agütsü nung, yimsüsürtemji vote agi masü saka süng - long aser injang-bomb dena amshia shimtsü merangra, ajibo election-ang magii ayongayonga kin tuluba ka nem, akhidang chuba shimba ama, shimdaktsü tajungba asütsü. Nübertem madak yimten yimsüsübaren nung yimsüsür shimtsü atema maongka agütsübaji, yimten yimsüsüba menden ya kibong ka mesüra kin ka meyong senmang ama küma moudaktsüi nübertemi nübertem mulungba nung yimten temzüng ozüng lateta yimsü südaktsüsa tangatetba aser nükjidong nung latetba yimten yimsüsübaren ka lir. Aji oda, election ajanga nübertemi yimsüsür shimba agi yimsüsürtem dangbo nübertemang temaba aser tashi tuluba akümer, kechiyong teshimsang dang nungibo teshimertemang tongtiba aser tashi tuluba lir. Ibaji teyanglubatem dang nungibo teyanglusang tashi tuluba aser temaba asüba amai lir. Ibaji kodang angatetdir, asenoki election nung asen vote kechayonga mayoktsü aser election nung asen vote asensasa agütsütsü jangratsü. Iba tangatetba aser tejangrabaji kodang asen dak mongdir, asenoki asen madak yimsü asütsü atema nisung tetemsü bushi tenzüktsü aser tetemsü rongnunga tetemsütiba ka temulung süsüa tashiyim agi masü tangatetba agi shimtettsü. Yimten yimsüsürtem election ajanga shimtetba nükjidongji nübertem rongnung meraratepdaktsütsü, ochimashi mapa meinyakdaktsütsü aser linük nung shisatsü tasen bentepa terenlok mapatem inyaktsü asoshi lir. Ajisüaka, item nükjidongji agiena yutsür tashiyim amshia shimba yimsüsürtemi kodaser nübertem dang tashiyim tamshi ta shitetsü ? Kasaji, election nung sen agi vote alia yimsüsür akümba nisung kati pei vote ayoker nübertem dang ochishia liang ta koda shitetsü ? Asenok tia maka, tangbo asenok asoshi election ya tashiyim aser sen agi akoktsü merangba tongpang amai ka dang kümogo. Ajisüaka, kodang asenoki election ajanga asen yimten madak yimsüsürtem shimba nükjidong angateta election agitsü merangdir, idangjibo election lokti senden tajung lia nübertem nungdak jembiteptsü, candidate-temi pei nübertem dang pei tebilemba aser nükjidong lemsateptetsü. Aji oda, election ya tang amai mapa tamajung inyaktsü sentong atongtepba mapang ka masü saka pei lima aser nübertem asoshi tajung inyaktsü tebilemba aser sentong jembitepba mapang ka kümadoktsü. Aji oda, kodang asenoki tajung inyaktsü indang bilema jembidir, iba mapangjibo raratepba mapang masü saka arogo nung asentenshi sentong akaba mapangang ka mesüka akümtsü. Iba amaji jangratema asen lima nung election agitsü yongyadi.

OLEMSABANG

TAWA AGIBA LOK SABHA ELECTION AJANGA NÜBUR TAGINÜBA MAPA AGI SAYUOGO

~ L. Kika Pongener.

Tawa agiba Lok Sabha Election nung, Congress-i takok anguba ajanga, Naga nunger nübur ajanga taginüba State aser Center sorkar dang mapa agi sayuogo. Ano iba Lok Sabha Election nung Naga lima nung küm ishika tejaklen nungi Clean Election yimyim ayima aruba shilem tuluba ka takok nguogo. Ano Center nung tesuiba sorkar nungbo 'Opposition Bench' Seat abensaa madokba, tang election nungbo Congress-i anir Opposition Party aika adokogo. Ajak dak alaka, Center nung BJP temeja agi sorkar akümtsüsa Seat abensaa mongutetbaji, talisa Muslim, Christian aser kin tilatem (Minorities)-tem atema takok tuluka asütsü. Anungji tang Lok Sabha Election ya tongtipang mapa aika nung takok anguba Election ka asütsü. Atangji, tang Lok Sabha Election nung MLA-60 tashi (Power), State Sorkar aser Center Sorkar tashi (Power) etc. item tashi ajakji bener Contest asüsang NDPP Candidate den, State Assembly nung MLA ka danga mena maliba Congress Party (INC) Candidate-i toktep aser tama-mangtsüka takok angu. Israel nunger otsü nung, Goliat tekolak nungi temesula tashi merang subotsü subor, merang Jong (Shield) aser Nu (Spear) teperi ammer alisang Nokinketer Goliat den, Dawid-i 'Lisu Iijak' ka den long tila pongu ammer rara, saka Dawid-i takok angu, kechiyong pa den Tsüngrem dena liasü. Aji oda, Congress Party ket nung sen maka, teka tazünga ta Naga nunger nübur ajaki meteta dang liasü. Aji oda, Naga nunger nübur teimba ka dak Party ideology tangatetba-a mali, Party manifesto tangatetba-a mali, saka sen shibai teimba agütsüdir...iba Candidate nemji Vote agütsütsü...Nübur teimbai aji dang angatet. Ajisuaka, tang Lok Sabha Election nung to-bo, Naga nunger nübur teimba kati Political tashi (Power) aser sen tashi (Money Power) nung khenyongi meranglok, aikati sen memeshi, saka ochishia pei temeden Vote Congress (INC) Candidate nem agütsür adokdaktsüogo. Aji oda, tanüngba kari dang, ashiko, Political tashi aser sen tashi dak rangloker pei temeden vote agütsür alitsü sudi. Anungji tawa Election takok anguba ya Naga nunger nübur asoshi mera tasen ka nung tetsüng ajemoker asütsü, aser Clean Election shilem tuluka takok angur asütsü. Iba takok anguba yagi State sorkar nung Chief Minister-i anir yimsusur ajak asoshi, aser Center Sorkar nung Prime Minister-i anir yimsusur ajak asoshi teshisadangtsü lesson tulu ka sayuogo. Atangji, tang Lok Sabha Election nung takok osang ya Naga nunger nübur taginüba ola state sorkar aser Center sorkar dang aser alima nübur ajak dang yimyim ayimoktsüba ola (Slogan) ka asütsü.

Asen yimsusur Wb. Subongmeren Jamir ya ashiko, tang Lok Sabha Election agiba mapang tashi nungpo, Naga nunger aikati nijaren nung (Personally) meteta malitsü sudi. Ajisuaka, tang Election nung-to, asen Naga nunger asoshi tesungmangtsü kaji...Nübur ajakibo nijaren (Personally) tejangja memetetba Candidate ka nem, Naga nunger nübur teimba ka tanga mapang Election nungbo pei temeden Vote senyong ayokertemi, sen tashi (Money Power) aser yimden tashi (Political Power) kecha nunga merangloki, Vote merijang tenem (50,000) tema agi takok angutsüsa Vote agütsübaji tesungmangtsüka mapa ka lir...!!! Naga lima nung tang Lok Sabha Election nung Congress Party-i takok anguba ya otsütsü mapa ka asütsü. Surabangla, iba ya Congress Party meimba agi agütsü asü (?) Candidate-ba meimba agi agütsü asü (?) Mesura kechi küli agi agütsü (?)...ta shisadanger. Ajisuaka, ya tanga kecha agi masü, saka Center nung BJP-i aniba NDA sorkar mapang, Christian-tem aser kin tilatem (Minorities) tali majung kanga mezüngmeshir aser reshikangshir. Ano aji dang masü, India lima kin tanak-temesung aika meyoktepa aliba linuk ka nung, oshi ka dang, tamang yimsu ka dang asütsü...Iba temzüng-ozüng yanglutsü merangba sorkar nem yimsu sudaktsütsübaji, nüburi memulonger ta mapa agi sayuba lir. Aji oda, Naga nunger tangar kin aikati Congress Party Candidate nem Vote kanga junga agütsüogo. Ajisuaka, Ao kin Christian yimsu mezüng agizüker tamangertem-ibo, RSS aser Bajrang Dal den sendaktepa aliba Party den Alliance nem aikati Vote agütsübaji kechi tangatetba agi agütsü ta nübur aika sungmanger...!!!??? Hau daka suang, nunga daka suang, Center sorkar nung, tanga Party-i yimsu asüdang kodanga Christian yimsu anema inyakba kecha mali. Indian National Congress (INC) Party-i India nunger Independent ngur küm 40-50 tema yimsu sua arudang tamang yimsu dak kongshiba kecha mali. India lima nung kin tulu-tila, tanak-temesung ajunga pei amangnüba yimsu sadema-sadema amanga aru. Ajisuaka, Morarji Desai Prime Minister sur, ita ishika Janata Party-i yimsu asüdang, tang BJP-i aniba NDA sorkar mapang amai Chistian yimsu anema kanga mejungi inyakba ajangshia aruogo. Ajisuaka, Morarji Desai pa taküm aser pai aniba sorkar kechi koma adem (?) Ibaji nübur ajaki otsü tejangja meteta lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Boko Haram-i pastor Paul Musa chioktsü atema sen akhanger



Boko Haram kiralongrartemi sayaba video ka nungi agizükba Pastor, Paul Musa noksa nung angur.

June 30, 2024: Tawa Islamic kiralongrar telok Boko Haram-i social media ajanga Pastor Paul Musa-i parnok dang pa tetepset, ta mepishiba video ka prokshiogo.

Video nungji Islamic kiralongrar ka prangpong amer nokdaka lir, aser iba jakdangji pastor Paul-i pa tetepset ta mepishir.

2023 küm March ita nung Nigeria kübok Borno State nung Boko Haram kiralongrartemi arrshi küm 59 pastor, Paul aser pa kinüngtsü Ruth (50) na puer ao.

Video nungji pastor-i süoshi temeremso ka semer lir. 2015 küm Libya nunga Islamic State kiralongrartemi tziyümküm ka nung Egypt nung Khristan 21

tekolak tangzuka tepsetba mapang nunga parnoki Khristantemji süoshi temeremso semdaksür liasü.

Osang angazükba agi, Boko Haram-i pastor Paul Musa chioktsü atema par kinüngertem dang Hombor (July 1, 2024) tashi nung Nigeria nung Naira sen million 200 (dollar sen 130,000) agüjang, mesüra Pastor Paul Musa tepsettsü, ta metetdaksüogo.

2009 küm nungi tenzuka Boko Haram, Islamic State West African Province (ISWAP), Islamic Fulani aser prangpong amer telok balalai Nigeria nung Khristan 45,000 shi tepsetogo.

June ita tetenzüklena ISWAP

kiralongrartemi Borno state nung Khristan asem tepset. Iba telok yagi mapang shia pastor aser putirtem puer aoba sülen parnok chioktsü atema sen akhanger.

Nigeria nung Khristantem kanga reskhikangshiba atema United States Commission on International Religious Freedom (USCIRF)-i U.S. Department of State dang Nigeria ya Country of Particular Concern (CPC) linüktem rongnung züngoktsü mepishir.

Taküm- report nunga USCIRF-i state department dang Boko Haram aser ISWAP ya Entities of Particular Concern (EPC) list nung züngoktsü benokogo.

Nicaragua nung sorkari Khristantem anema inyaker: USCIRF

June 30, 2024: Hokolbarnü United States Commission on International Religious Freedom (USCIRF)-i report tasen ka ajanga Nicaragua nung sorkari Khristantem yimsü temeden anema kanga inyaker, ta metetdaksüogo, ta International Christian Concern (ICC)-i metetdaksü.

USCIRF report nungji Nicaragua linük nung sorkari Catholic aser Protestant Khristantem anema inyakba osang tejangja metetdakja lir.

"Nicaragua sorkari maneni Catholic Arogoi meimchir temeden atema nokdakba asoshi Arogo anema inyaka Arogo lenirtem apur, tepuokdak ayur, lenirtem linük nungi meindoker aser Catholic charity aser shisaliok organizations indang kiojen soita ayur," ta report nung shia lir.

"Ortega (Tir) aser (tatong Tir) Murillo nati maneni sorkar tashi amer alidang ketdangsertemi Protestant denominations anema maneni inyaker," ta report ajanga metetdaksü.

USCIRF report ajanga

ashiba agi, Nicaragua Tir Daniel Ortega aser pa kinüngtsü aser tatong Tir Rosario Murillo nati Catholic putirtem dang "mojing tenzükertem" ta ajar aser Arogo ya ozüing alema inyakba telok ama züngshir.

2018 küm linük nung nüburtemi sorkar anema longkak aitba mapang nungi tenzuka Ortega aser Murillo nati nüburtem madak tashi tulu amshir.

2018 küm longkak aitba mapang nungi tenzuka Nicaragua ketdangsertemi Khristantem anema inyaker, kechiyong parnoki Khristantem ya sorkar anema amokmeren ama züngshir.

Iba linük nung Khristantem anema tiyazü nung tai tongloktsüba sülen apur. Arogo lenirtemi senotsü tsütsü ochimashir, ozüing alema inyaker mesüra olulu prokker, ta tiyazü nung tai tonglokja apur. Tatishitsü agi ozüing No. 1042 ajanga-a osang tai prokba-a ozüing alema inyakba aibelen ka ama züngshir.

Yaküma iba linük nung

Catholic putir, Rolando Alvarez anema tai tongloktsüba sülen pa küm 26 tepuokdak ayutsü obendang agütsü aser senso temeden-a agien.

Sorkari meimchir temeden anema inyakba aser Catholic radio stations aika shibangtsüba atema Alvarez-i sorkar aija liasü. Tesüsa pa jail nungi chiok saka Vatican-i yokogo.

Taküm March ita nunga iba linük nung Evangelical Christian missionary organization 'Mountain Gateway nung inyaker Protestant pastor 11 küm 12 nungi küm 15 tashi tepuokdak ayutsü obendang agütsü aser senchi dollar sen million 80 chiego.

USCIRF report ajanga, "Tang Nicaragua nung Khristantem reshikangshiba ya manentsüa akok. 2018 küm longkak aitba mapang nungi tenzuka Ortega-Murillo sorkari yimsü temeden anema inyakba kanga bulua kümogo. Sorkari parnoki latetba ozüingtem amshia Catholic aser Protestant Khristantem reshikangshir," ta metetdaksü.

ANOGO ABEN TSÜNGREM DEN

Dawid Asoshi Ki Ka

- T.Ken 132:11-18.

Tsüngremi chuba Dawid dang pa ki ka asütsü memela. Iba melen Tsüngremi Dawid asoshi ki ka sütsü. Tsüngremi ashi, "Dawid, ni ne temang asoshi ki ka mesütsütsü saka nübur asoshi ki ka sütsütsü. Idakji na nungi jakzükba ka teti Israel chuba menden nung alitsü".

Pai ano Dawid chirtem asoshi langka ashi, "Ne jabasotemi kü tezüngzüktepba aser kü kulitem koba Ni parnok dang sayutsü aji beshidi süra parnok jabasotem ne chuba menden nung teti mendaktsütsü. Kechiyong Kibubai Zion Pa talidak asütsü Pai aji aginü". (t.12,13). Idagi Tsüngrem chirtem asoshi teinyaktsü ka lir. Pai alima meyangludang Khrista nung asenok shimtet (Ef1:4) Yisui ashi, "Nenoki ni shim masü saka ni nenok shim" (Yn15:16). Koda Temeshi maongka tulu !

Asenok Tsüngrem chirtem asütsü shimtetta liasü. "Temeibatem, dang asenok Tsüngrem chirtem lair, aser tesü asenok kechi asütsü ano jungkai madok. Pa jungkai adokdang asenok pa ama asütsü, kechiaser Pa komama lir aji oda asenoki pa angutsü, aji asenoki metet". (1Yn 3:2). Koda tesüngmangtsü tajaba! Pauli ashir asenoki taküm nung yimsü asütsü (Rom 5:17). Tsüngremi asenoki taküm nung chuba ama yimsü südaktsüner.

Asenoki tashi angaba aser temeshiba ajanga yimsü asür. Tsüngremi pa sentsüwangshi asoshi asenoki temeshiba nung yimsü südaktsüner. Kechiaser Yisu Khrista nung tamang ajanga asenok pa chirtem lir, asenok kotak nung Khrista den amen. Anungji asenoki tekümtet sopudi. Asenok tepela asoshi ayimtendi.

Kenü tamangertemi Khrista den pa yimli nung yimsü asütsü. Saka tanü pai taküm nung yimsü asütsü na aginer. Nai Khrista den yimsü asür asü? Nai Tsüngrem o nung tashi angadang aser ne mulungjang merüka ayudang, na chuba ka akümer. Taküm nung ne tanelaren teküpbok jenjang nung teli. Chuba ka süang.

India nung Khristantemi sorkar dang maneni tekümzükba meshir

June 30, 2024: Tesüiba ita ka nung lia Khristantem jagi ishika tsüngda India nung sorkar dang parnok nem Khristan minority tem anema tekümzükba agüjang ta inyakba jenjang ano tamajungba dang kümogo aser tamangertem tetsübu nung dang alir, ta International Christian Concern (ICC)-i metetdaksü.

Taoba hopta nunga police-i house church aika mita aoba mapang Khristan aika puogo. Khristantemi Hindu nungertem Khristan yimsü dangi meyipdaksütsü merang, ta tai tonglokja apu, ajisüaka parnoki Khristantem anema kulibo magütsüteter, ta ICC-i metetdaksü.

Northern India nung aliba yimtsüing area ka nung tamanger Meitei nung ishika dang lir, saka parnok kanga reshikangshiba ajanga iba tesem nungji parnok ajak samatsüa akok.

Iba atesem nungji tesüiba ita aika tsüngda Tenla kitem aika rongdoktsüogogo aser kibong aika talidak makai kümogo. Yangji alirtemi Meitei Khristantem ishika dangji Khristan yimsü tangsa tokjang mesüra nenok meshidaksü, ta amokmerenogo.

Iba ama amokmeren tensa

ka nung lia Khristantem jagi ishika tsüngda India nung sorkar dang parnok nem Khristan minority tem anema tekümzükba agüjang ta mepishir.

June 26, 2024 nü Meitei nung Khristantem jagi shidi ka ajanga India Tir dang tiyongtsü aita inyakdaksüner aser sorkar danga nisungtem jenshiba nokdangtsü atema inyakdaksüner, ta mepishiogo.

June ita nung Chhattisgarh nunga Khristantemi lenmang nung longkak aita Khristantem reshikangshiba anentsü atema takhangba agüja liasü.

Chhattisgarh state nung Khristantem anema inyakba kanga bulua atalokba anema tribal Khristantemi yimdong süa jaja longkak ait.

June 24 nü Raipur district kübok Motibag jila nung tribal Khristantemi ozülü balala amer longkak aita liasü. Parnoki "Khristantem anema inyakba anenang," "Onoki ochi temeden aginer" aser "Tamangba yimsü nung ajemdaker mezüngmeshiba ya onoki magizüktetsü" ta ozülü balala amer liasü.

Nütsüing million 30 aliba Chhattisgarh state nung nütsüing shilem 2 dang Khristantem lir.

AO OSHI ANGAZÜKDAK:

TANÜ ANGAZÜKTSÜBA OJANG



Tagütsüba

(n) angati agütsüba aser anguba (given free of cost)
* Taintemi tagütsüba osettem ajak tanurtem nem agütsü.

Tai

(v) shitak masü (wrong)
* Ni mapa aika tai inyak.

OLONG PAITEP # 6833

Grid for OLONG PAITEP # 6833 with numbers 1-17 in various cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung telemasa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6832 TELANGZÜBA

TIPIEN :

- 2. Bangsemo, 6. Tiptem, 8. Jen,
9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

NAI-A YA METETTER MA



Paris Saint-Germain (PSG)-i Barcelona superkid Lamine Yamal alizüksü kanga meranger. Taküm January market sülen PSG-i arishi küm 16 tain Yamal alizüknür ajisüaka Barcelona-i €200m-plus proposal magizük. PSG-u Yamal ya Kylian Mbappe melenzüktsü atema alizüknür kechiyong Mbappe Real Madrid-i alizükogo. PSG-i Euro Cup temer €250m agi Yamal alizüktsü mulunga lir ta Mundo Deportivo-i ashi. Yamal-i Barcelona 2026 tashi tenangzüktep agia lir aser iba atema buyout clause €1bn lir.

Imphal nung apu tasen ka chirepdang nisung 1 asü



Imphal, June 30, 2024 (Agencies): Imphal West district kübok Imphal River ayong temdanga yangluba apu ka Deobarnep chirep.

Irong aser Murum Phibou yimtsüngtem tsüngda iba lendong atalok aser truck driver ka asüba den nisung 3 yiru.

Tanep 7:00 ako meta khu abenba truck gari ka apu ajanga

süidang chirep. Imphal River nung tzü kanga ayimba ajanga lendong tamajungba aküm.

Truck driver ji Mayang Imphal nungi arishi küm 48 tain Usabuddin liasü ta jangjaogo. Ajisüaka pa den külemi mena alir nisung asembo jenbutet.

Osang angashiba sülen Manipur police aser fire service

personnel tesem tonga oa yaritep aser iba lendong atema bushisüngdang ka tenzükogo.

Manipur Panchayati Raj Minister Yumnam Khemchand-ia lendong atalokba tesem semdanga tensa asadangogo.

Minister Yumnam-i anogo asemnü tsüngda bushisüngdang asütsü tetuyuba agütsüogo.

Meghalaya nung HNLC-i amnesty atema inyaktsü akok

Guwahati, June 30, 2024 (Agencies): Meghalaya sorkari amnesty indang jembiba sülen Hynniewtre National Liberation Council (HNLC)-i olemtep tenzüktsü atema asadangdar.

"Sorkari amnesty agütsütsü shidangba ajanga parnoki shisadangdar" ta HNLC interlocutor Sadon Blah-i ashi.

"HNLC-i olemtep malitsü asoshi lemtet kecha agia mali. Parnoki amnesty, telok nokdangba agientsü aser par züngsemtem anema ken o benoka alibatem agientsü akhanger. Sorkari item takhangba agizükra parnoki olemtep mulunga lir" ta Blah-i ashi.

Chief Minister Conrad K

Sangma-i HNLC nem amnesty agütsütsü atema olemteptsü mulunga aliba ashiba sülen iba osang angazüker.

Ken o tila atema amnesty saka tulutembo ka khen ka ta angadangtsü, ta CM Conrad-i shia liasü.

HNLC-i akhangba onüktem magizükba ajanga yimjung olemtep nung parnok medeni aküm.

Assam IAS Officer Vishal Solanki-i voluntary retirement agir

Guwahati, June 30, 2024 (Agencies): Assam sorkari IAS officer Vishal Vasant Solanki indang voluntary retirement application agizükogo.

Solanki ya Assam-Meghalaya cadre 2005-batch IAS officer lir aser taoba mapang pai Assam Chief Minister Sarbananda Sonowal atema secretary inyakogo. 2017 nungi Solanki ya

Maharashtra nung deputation nung inyaka aru aser tawa tu ang Assam-i meyipa arur commissioner & secretary inyaka liasü.

Ajisüaka nija khuret kar nung ajemdaker Solanki-i All India Service (DCRB) Rules nung Rule 16(2) kübok voluntary retirement meshi.

Iba atema Assam Secretary, Personnel Department, Yadav Shaikia-i June 25 nü Solanki

May ita nungi voluntary retirement agiba agizükogo.


Assam nung IAS aser IPS officers aikati voluntary retirement agia aruba mapang ka Solanki-ia agiogo.

Solanki-i nija khuret kar nung ajemdaker sodi agi saka ketdangsur aika voluntary retirement aser central deputation maparen inyakba ajanga nübortemi political pressure onük adoka jembir.



India nung Central Universities tajungtiba jenjang 15 buba nung Mizoram University (MZU) lir ta Indian Institutional Ranking Framework (IIRF) ajanga metetdaksüogo. IIRF-i kümshia India nung universities asadanger aser taküm mezüngbuba jenjang nung Jawaharlal Nehru University (JNU), New Delhi lir. 2023 nung Mizoram University-i top 20 Central Universities nung jenjang 13 buba nguteta liasü.

Biden-i payarir dang election nung takok angutsü nenshia ashir



Washington, Aami/June 30 (Agencies): O intepba mapang junga shilem magitetaka Democrat donors tem dang November ita Donald Trump den tir election nung toktepba nung paisa takok angutsü, ta US Tir Joe Biden-i ashir.

Arishi küm 81 tain Biden ya New York aser New Jersey nung Honibarnü fundraising sentong balala nung shilem agia liasü.

Sentong ka nung jembidang, "Brehostibarnü ni junga shilem magi aser Trump-a kasaji liasü," ta ashi.

"Asenoki iba election nung takok angutsü ta nenok dang ni nangzüker," ta pai ashi.

O intepba mapang Biden-i telangzüba tajung magütsü, anungji iba election nung tokteptsü atema pa ya candidate

tetemsü asü masü ta Democrats tem mulungjang nung tsüboa aiter.

Taoba Democratic House speaker Nancy Pelosi-i Biden indang o intepba jangratemtsü maket liasü, ta ashi aser taoba mapang pa indang communications director Kate Bedingfield-ia temulung khenyongi masü ta ashi.

Nüburtemi bilemba angateter ta tiri ashi saka tesashiba raratsü nangzüker.

Democratic telok nungi New Jersey indang governor Phil Murphy ya fundraiser nung Biden aser First Lady den külemi aden aser Biden dang nüden onok ajak 1,000 shilem dena lir ta shia liasü.

Biden campaign ajanga o intepba ya parnoki imlaba ama mao ta ashi saka pai dangar

nominee ka atema maongka magütsütsü ta ashi.

O intepba sülen voters temi opinions poll agiba nunga temelenshi mali, ta campaign chairwoman Jennifer O'Malley Dillon-i Honibarnü ashi.

Taoba mapang US tir aser Biden tembar tajung Barack Obama-ia social media nung o intepba majung liasü, ta ashi.

"Iba election ya pei arishi tepiyong nüburtem asoshi rarar aser pei atema dang bilemba nisung tsüngta shimtsüba lir," ta Obama-i zülua liasü.

Brehostibarnü o inteper ghonda ishika lir Trump-i pa bhukumer tem dang iba o intepba ya pa nübuyim asoshi takok tulu ama züngshir ta ashi.

"Joe Biden indang tebilemstü ya pa indang arishi küm masü. Pai takok ngua mapa shidak meinyaktetba tebilemstü ya lir. Pa mabensa," ta arishi küm 78 tain Trump-i ashi.

Yimten yimsüsüba nung tetsüing ajemoka alirtemi kisüing masü saka osangbener temia temulung masüba shia liasü.

Brehostibarnü o intepba sülen Hokulbar nikongdang tashinung sen million \$27 dak tema bendenogo, ta Biden indang campaign chairwoman Jennifer O'Malley Dillon-i ashi.

Nigeria nung telungpurtemi nisung 18 tepset

Abuja, Aami/June 30 (Agencies): Nigeria kübok Borno State nung pei temang nung bomb alenoker pokdaksür tetsürtem asütsü ta temulung melemi bilemertemi, kiyimba benjung ka, mozüki ka aser asüpila sentong ka amakba sülen nisung 18 süogo aser aika yiruogo.

Iba lendong ya Honibarnü Gwoza jila nung ataloka liasü, koba Cameroon den arrtsü nung lir, ta Borno State police otongdar Nahum Kenneth Daso-i Deobarnü ashi.

Tesem asem amakba rongnung ka nikongtsütsü 3:45 nung atalok. Tanur ka ponger tetsür kati nisung aika adenshia aliba motor park ka nung improvised explosive device (IED) ka pokdaksü, ta Daso-i ashi.

Pei temang nung bomb alenoker pokdaksürtemi yagi kasa jila nung mozükia ka maka liasü. Maneni kiyimba benjung nung asürtem atema asüpila sentong agia aliba mapang ano tesem ka maka liasü, ta ketdangsurtemi ashi.

"Tang tashi nung tanur aser mashisa aliba tetsürtem densema nisung 18 asüba jangjaogo, ta agency tekolakba Barkindo Saidu-i ashi.

Lendong nung kanga mejungi yirur alir parnok 19 regional yimtiba, Maiduguri-i anirogo aser ano nisung 23 anintsü atatepdar.

Kasa mapang nung Gwoza nung military nem teyari agüja

aliba militia züngsem kati ashiba agi, parnok telok nungi külem züngsem ana aser sepaia ka ta security post ka amakba mapang tepsetogo.

Ajisüaka ketdangsurtemi iba tatalokba nung nisung asüba indang osang tejangja magütsü.

Borno nung küm 15 dak tema azütokshi lendong ataloker nüburtem timtema arudar. Iba tesem nung nisung meyirejang aika tepsetogo aser aika pei talidak ki toktsür jenshiaogo.

Nigeria military-i telungpurtem tashi tajemba küm daksüogo, ajisüaka parnoki civilian aser security tem mapangshia maka arudar.

2019 küm iba tesem nung pei temang nung bomb alenoker pokdaksürtemi tesem asem amakba sülen nisung 30 asü.

Boko Haram aser parnok nungi jakzüka Islamic State West Africa Province (ISWAP) na talisa Borno temeket nung inyaksangshir.

Boko Haram puri tetsür aser aiür chanutem pei temang nung bomb alenoker tesem balala amaktsü yoker. Parnoki 2014 küm Gwoza atsünga liasü.

Ajisüaka iba jila ya Chad sepaitem teyari agia Nigeria military-i 2015 küm meyipa agiogo, saka iba telok yagi maneni iba jila maka arudar.

Iba azütokshi lendong nung nisung 40,000 dak tema tepsetogo aser nisung million ana shi jenshiaogo.

Iba mangatetep ya kidanger Niger, Cameroon aser Chad-ia

prokshioogo aser iba ajanga telungpurtem den raratsü asoshi regional military coalition ka tentetsüsa aküm.

Iran nung tir election July 5 nü agishitsü

Tehran, Aami/June 30 (Agencies): Iran nung tir election ajungbena June 28 nü agiba nung reformist temi yariba Masoud Pezeshkian aser hardliner Saeed Jalili nungeri vote timba nguaka majority mongutetba ajanga taruba hopta agishitsüsa akumer.

Iran nunger vote agütsütsü temsüa aliba nisung million 61 dak tema nungi shilem 40-i dang vote agütsü, ta Ministry of Interior ajanga Honibarnü ashi, koba linük nung 1979 revolution sülen tir election nung shilem tajemtibai vote agütsüba alitsü.

Ministry nung election headquarters nungi sangdongba nung votes million 24.5 dak tema azünga nungi Pezeshkian-i votes million 10,41 dak tema angu aser iba sülen taoba mapang nuclear negotiator Saeed Jalili-i votes million 9.47 dak tema nguua liasü.

1979 revolution sülen tir election round tanabuba agiba tan ya tanabuba alitsü.

Parliament nung conservative Speaker Mohammad Bagher Ghalibaf-i votes million 3.38 angu aser conservative Islamic leader

Russia-i Vilniansk jila amak; nisung 7 tepset

Kyiv, Aami/June 30 (Agencies): Russia nunger sepaitemi Ukraine kübok Zaporizhzhia yimti anasa Vilniansk jila nung missile khaloktsüba sülen nisung tenet tepsetogo, kong tanur ana densema liasü. Iba lendong nung nisung 31 yirua liasü, ta ketdangsurtemi ashi.

Iba lendong atalokba sülen tir Volodymyr Zelenskiy-i parnok nem teyari agütsüba linüktem dang Ukraine nem long-range missile aser air defences agütsütsü maneni khangogo, aser ashiba agi iba ajanga dang rara nokdangtetsü.

Ukraine indang Prosecutor General Andriy Kostin-i ashiba agi, iba jila dak missile ana khaloktsü aser iba ajanga infrastructure tem, dokan ka aser nisung aliba ki ka raksaja liasü.

Emergency services-i, iba lendong nung tanur ana densema nisung tenet asü aser nisung 31 yiru kong tanur 13 densema lir ta ashi. Mibenertemi ki aika nung mi atoka aliba temseptzüogo aser tekümzüka maparen tembanga inyakogo.

"Tanüa tsükchirtemi civilian tem anema kiralongrara inyakim ka benoka inyakogo," ta Zaporizhzhia Regional Governor Ivan Fedorov-i video osang ka ajanga ashiba Telegram messaging app nung

post süja liasü. "Iba jila ya anogo tom nung amak. Soti anogo ka asünung nüburtem jila teyongtsü, kong military target kecha mali iba tesem nung adenshir kazütepa aliba mapang amak," ta Fedorov-i ashi.

Zelenskiy-ia, iba tesem indang noksatem lemsatepogo, kong ali tulu ka pokteta tugur aliba, süngtong laoer aliba aser tarpaulin ana ali nung lemer aliba ngugo.

"Ozü nüburtem aser yimitem Russia nungeri anogoshia amakba ajanga tim atemer. Ajisüaka iba ya nokdangtsü lenmangtem lir," ta Zelenskiy-i Telegram nung zülutsü.

"Kiralongrartem parnok amendaka aliba tesem nung raksatsüba, Russia nunger indang missile luncher tem raksatsüba, long-range missile agi amakba aser Ukraine nung modern air defence system tali amenokba ajanga iba ya nokdangtetsü," ta Zelenskiy-i ashi.

Iba tatalokba dak sendakba nung Russia indang Defence Ministry-i kecha telangzüba magütsü.

Russian ministry-i Telegram ajanga parnoki Zaporizhzhia nung tesem ka amakba indang metetdaksü, kong Ukraine nunger train temi prangbong injang aser military hadirtem agizüker, ta ashi.

tongtipang election nung vote agütsür tajemtiba liasü.

2022-23 nung azüdokshia linük tesem ajungalen longkak aiter ano junga ketdang masüba aser United States ajanga tenokdangba balala agütsüba ajanga osettsüset nung shilem 40 dak tema jenjang temlokba sülen voter aika ratamata arua vote agüja liasü.

July 5 nü ang Iran nunger timba arutsü amai imlar, kechiaser iba mapang nisung ana dang toktepa alitsü, kong Pezeshkian ajangzüktsü akok.

Pezeshkian ya yimten yimsüsür tejangja aser taoba health minister lir, shiba taoba centrist aser reformist tir aser ano danga lenirtemi yarir. Pai alima nung tashi tait linük tem den 2015 nuclear deal benokshia tenokdangba agiendaksütsü aser nüburtem aser establishment tsüngta tawa aliba nung apu alatsü nangzüka lir.

Jalili ya Supreme National Security Council nung züngsem tejen ka lir, aser pai inflation ya ajema rongsenketzung shilem 8 indaksütsü, ochimashi anema raratsü nangzüka lir. Pai anüolen aliba linüktem tsütsü temulung magütsür.

West Indies den mezügbuba Test asaya 2 atema Bairstow meshim

Aami/June 30, 2024 (Agencies): West Indies den taruba ita Test asayatsü aliba atema mezügbuba asaya ana atema England team sangdongba nung Jonny Bairstow densema mali. Pa maliba mapang Jamie Smith wicketkeeper amentsü.

Iba team nung Surrey atema primary wicketkeeper Ben Foakes-a mali, kong arishi küm 23 tain Smith ya specialist batsman ama asayar.

Asaya 14 rongnung tang mezügbuba asayatsü atema shimba asayar asem rongnung Smith-a densema lir. Asayar tasen ana ya Gus Atkinson aser Dillon Pennington lir.

Ajisüaka Jack Leach-a meshim aser pa indang Somerset teammate Shoaib Bashir kija team nung specialist spinner asütsü.

Bairstow shiba England tenüng nung Dharamsala nung India den asayaba mapang 100benbuba asayaogo pai Test asaya nung junga masayateti

arudar aser pai taoba innings 10 nung run timtiba yanglubaji 38 lir.

Tetsüng yiruba ajanga küm ka shi masayai lir asaya tenzüksüba sülen Bairstow-i junga masayateti arudar.

India 4-1 agi makokba asayamung nung wicketkeeper kanga junga amenba atema aikati tenüngsang agütsüogo, ajisüaka pa indang Test batting average 30 tekübok lir.

Smith, shiba taoba küm Ireland den ODI asayamung asayaba mapang anaben asayaogo, pai coach Brendon McCullum aser captain Ben Stokes la lenisüba nung England team indang 'Bazball' strategy kanga junga agizükter ama repringteter. Surrey nungi County Championship asayaba mapang pai kanga junga asayaogo aser Warwickshire den asayaba mapang pai ball 179 nung run 155 yanglu aser iba ajanga asayar shimertem atsüa aru.

England aser West Indies na

mezügbuba Test July 10 nü Lords nung asayatsü aser iba asaya ya asayar tejen James Anderson atema tatembangbuba asütsü, shiba arishi küm 41 lir.

Team nung bowling lineup ajungkettsü atema Chris Woakes züngokemogo, shiba 2023 Ashes sülen tang mezügbuba team nung züngoksemogo.

Sussex seamer Ollie Robinson-a Deobarnü sangdongba team nung züngoksema mali. England squad nung Matthew Potts züngoksemogo, shiba 2022 küm mezüng asayaba mapang wicket 23 agia liasü.

James Anderson-i tang tashi nung Test asaya nung wicket 700 agia lir, koba iba asaya puti otsü nung fast bowler tangatem den medemangtsü makok.

Maneni Anderson-i England nung Test asayaba mapang wicket 187 agia lir aser iba ajanga kidang asayaba mapang pai asaya aziüka asayaba sayur.

Villa midfielder Luiz Juventus nung denogo



Aami/June 30, 2024 (Agencies): Italy club Juventus-i Aston Villa midfielder Douglas Luiz pound million 42.35 agi alizükogo.

Arishi küm 26 tain Brazil nung asayari iba Seria A club den küm pongu atema tenangzüktepba yangluogo.

Luiz shiba Brazil team nungi 15 asayar lir, pai Villa nungi asaya 204 nung asayaba mapang goal 22 idaktsür lir. Pa 2019 küm Manchester City nungi Aston Villa nung oa dena liasü.

Midfield nung asayasang ya tang Brazil national team den United States nung oa Copa America asayadaki aser pa idakji Juventus atema medical tetendangba agiogo.

"Bianconero ka akümba atema ni kanga pelar," ta Luiz-i social media nung video ka ajanga ashi.

"Ni Allianz Stadium nung asayatsü matateter. Yakta

ajurutsü imla atati aser Forza Juve," ta pai ashi.

Luiz-i taoba season Villa nungi Premier League nung 35 ben asayaogo aser iba mapang pai goal teku idaktsü. Par team Premier League nung pezübuba nung tembangba sülen tang mezügbuba Champions League atema qualify süa liasü.

Ajisüaka Villa pur Profit and Sustainability Rules (PSR) sülen anidaktsüsa akümba ajanga parnok asoshi tongtibang asayar ka ayoktsüsa kümogo.

PSR temzüng ozüng ajanga Premier League club tem küm asem tsüngda pound million 105 akoksaba atemabo kecha temerenshi magütsür.

Villa-i, midfielder Tim Iroegbunam Everton dang pound million 9 agi yokogo aser Chelsea-i arishi küm 18 tain midfielder Omari Kellyman pound million 19 agi alizükatokogo.

Euro 2024: England-i goal 2-1 agi Slovakia kokogo



Aami/June 30, 2024 (Agencies): Deobarnü England aser Slovakia na round of 16 asaya England-i goal 2-1 agi koka quarterfinal-i iogo.

Asaya nung mezügbuba goal Slovakia nung 25buba nung idaktsü, aser asaya tatemtsü tashi parnok tejakdang liasü.

Ajisüaka atakzüka aliba mapang tembanger mapang apuloktsür asayaba mapang minute 90+5 nung Bellingham-i goal ka idakja goal kasasa aküm.

Goal kasasa asüba ajanga extra time asayatsüsa aküm aser iba mapang minute 91buba nung Kane-i England atema tanabuba goal idaktsü aser Slovakia-i iba goal meküptokteti asaya tembanga liasü.

Euro 2024 ayongzüka asayaba linük Germany-i Deobarnü Signal Iduna Park, Dortmund nung Denmark goal

2-0 agi akokba sülen quarterfinal-i iogo.

Asaya nung Kai Havertz-i mezügbuba goal idakja Germany team tejakdang küm daktüsü aser iba sülen mapang tatsüka lir Jamal Musiala-i tanabuba goal idakja parnok asaya akok.

Asaya minute 25 asayar aliba mapang rür tsükba aser mopung kanga sashia aonba ajanga asaya mapang tatsüka atema anena atatsüsa aküm.

Switzerland den tesüsa goal 1-1 agütsür tembangba asaya nung asayaba asayartem rongnungi Germany coach Nagelsmann-i asayar asem melener asayadakja liasü.

Nico Schlotterbeck-i, central defence nung suspend sütsür alisang Jonathan Tah melen, David Raum left-back nung asayadaktüsü aser Florian Wirtz melena right wing nung Leroy Sane asayadakja liasü.

Asaya nung mezügbuba

goal ya Schlotterbeck-i minute pezü tsüngda idaktsü, saka goal midaktsü tsüngda Joshua Kimmich-i foul ka menaba atema iba goal magi aküm.

Quarter nung Germany team Spain mesüra Georgia den asayatsü.

Kasa asayamung nung Switzerland-i Honibarnü Olympiastadion, Berlin nung round of 16 asaya tanga ka nung Italy team goal 2-0 agi kokogo.

Asaya nung Remo Freuler aser Ruben Vargas nati goal kaka idaktsüba sülen parnok defending champions Italy tsükdaktsüogo.

Taoba Arsenal midfielder Granit Xhaka, shiba taoba season German champions Bayer Leverkusen nungi kanga junga asayaogo, pa lenisüba nung Switzerland team-i asaya amokbanger asaya aser parnok Italy nem kecha maongka magütsü.

INDIA OSANG : Tapak 3 nungi...

General Upendra Dwivedi-i Indian...

General Dwivedi ya Madhya Pradesh nungi lir. Pa Rewa nung aliba Sainik School nung azüng aser 1981 küm January ita nung National Defense Academy (NDA) nung aden. 1984 küm pa 18th Battalion of Jammu and Kashmir Rifles nung commission süa liasü.

Tesüba küm 39 tashi sepai nung alidang General Dwivedi ya Kashmir valley nung unit commander liasü aser

Rajasthan sector nunga commander liasü. Pa North East sector nung Assam Rifles Sector Commander aser Inspector General (IG)-a inyak.

Army tongti menden nungi anisüngzüksang, General Pande ya Corps of Engineers nungi COAS akümer mezügbuba liasü. Pa NDA nung azüngba sülen 1982 küm December ita nung Corps of Engineers nung commission süa liasü.

BILEMDANGANG

"Nisung ajak maongka tanaben agütsütsü langa lir."